

## CELEBRATING TRIPLE SUCCESS AT EPF INTERNAL FUND MANAGER AWARDS 2025



### TH Plantations catat untung bersih suku ketiga lebih besar RM31.6 juta



TH Plantations Bhd (THP)

KUALA LUMPUR: TH Plantations Bhd (THP) merekodkan keuntungan bersih sebanyak RM31.6 juta pada suku ketiga berakhir 30 September 2025, meningkat 47 peratus daripada RM21.5 juta pada suku sama tahun sebelumnya.

Pendapatan bagi suku dikaji meningkat sebanyak tiga peratus kepada RM259.6 juta daripada RM252 juta pada suku sama tahun lalu.

Menurut kumpulan itu, prestasi menggalakkan pada suku ketiga itu disokong oleh harga produk sawit yang lebih tinggi serta kecekapan operasi yang berterusan di ladang dan kilang miliknya.

Peningkatan itu, katanya, dipacu oleh harga purata direalisasikan yang lebih tinggi bagi minyak sawit mentah (MSM), isirung sawit (PK) dan buah tandan segar (FFB), di samping peningkatan jumlah jualan PK dan FFB.

"Bagi tempoh kumulatif sembilan bulan, TH Plantations merekodkan pendapatan sebanyak RM658.7 juta, meningkat lapan peratus berbanding RM607.3 juta dalam tempoh yang sama tahun lalu.

Manakala, keuntungan bersih bagi tempoh itu meningkat 25 peratus kepada RM56.2 juta daripada tempoh sama tahun lalu, mencerminkan harga jualan yang lebih baik serta inisiatif pengurusan kos yang berterusan.

"Usaha berterusan dalam mekanisasi dan automasi telah membantu meningkatkan prestasi operasi. Peningkatan kompetensi modal insan dan kecekapan operasi kekal sebagai keutamaan kami dalam menangani kenaikan kos, terutamanya yang melibatkan pematuhan kepada keperluan gaji minimum dan caruman statutori bagi pekerja asing," katanya dalam kenyataan hari ini.

Dari segi prospek, THP berkata, harga MSM dijangka kekal mencabar, dengan ketidaktentuan dan tekanan berterusan pada suku keempat, dipengaruhi oleh persaingan dalam permintaan global, ketidaktentuan geopolitik yang berterusan serta peningkatan pengeluaran.

"Dengan pengeluaran dijangka mencapai kemuncak pada suku keempat dan bekalan kukuh daripada minyak sayuran lain, khususnya minyak kacang soya, tekanan harga dijangka berterusan. Arah pasaran juga akan bergantung kepada kadar kemajuan program biodiesel Indonesia," katanya.